



BULLETIN



Reik na die sterre 'n Groep Genies het onlangs met groot sukses aan die gewilde Kaleidoscope revue-platform se heel eerste Wes-Kaapse kompetisie deelgeneem.

GENIES HOOGTEPUNTE

- ➔ Akademiese uitslae
- ➔ Eisteddfod-nuus
- ➔ Somersport

UIT DIE SKOOLHOOF SE PEN

Beste Ouers en Voogde

Dit is met 'n dankbare hart dat ek aan die einde van 'n propvol derde kwartaal kan terugkyk op alles wat ons as skoolgemeenskap vermag het. Soos altyd was dit 'n besonder bedrywige tyd. Wat 'n voorreg om deel te wees van 'n skool waar akademie, kultuur, sport en karaktervorming hand aan hand loop!

Ek wil elke ouer/voog, personeellid en leerder graag bedank vir hul ondersteuning, betrokkenheid en

onmisbare bydrae tot die sukses van die skool.

Die afgelope paar weke het weereens bewys dat ons skool 'n plek is waar geleenthede geskep word, waar talent ontwikkel word en waar kinders die ruimte gegun word om hul volle potensiaal te ontdek.

Geniet die welverdiende blaaskans saam met u gesin. Ek sien uit daarna om in die vierde kwartaal saam met u voort te bou aan die welslae van Laerskool Gene Louw.



VOOR ONS GAAN...

- Alle **rapporte** word deur die loop van vanoggend per e-pos gestuur.
- Sien d6 vir vandag se **gestapelde verdagings** per graad.
- Die skool heropen weer op **Dinsdag 6 Oktober**.

Padveiligheid: 'n noodroep

Ongelukkig moet ons alle ouers weereens versoek om die **verkeersreëls te gehoorsaam** ter wille van die veiligheid van ons leerders en ander padgebruikers.

Die skool ontvang gereeld klagtes oor gevaarlike oortredings wat groot ongelukkigheid in die strate rondom die perseel veroorsaak. Bestuur asseblief bedagsaam, wees geduldig en stel 'n goeie voorbeeld vir u kind(ers). Ons maak staat op u begrip en samewerking.



Sportsamevatting

→ **Toernuus** Die o/13A-seunskrieketspan het Pretoria onlangs vir die eerste keer besoek, waar hulle teen vier sterk skole meegeding het. Dit was 'n wonderlike geleentheid wat die seuns in staat gestel het om hul vaardighede verder te ontwikkel en as 'n span te groei.

Ons o/13A-dogterskrieketspan het ook vir die eerste keer op toer gegaan, met Knysna as bestemming. Die meisies het waardevolle wedstrydervaring opgedoen en die krag van spanwerk ervaar tydens dié onvergeetlike belewenis.

→ **Somersport** Ons sien uit na 'n opwindende somer en wens almal 'n suksesvolle seisoen toe! Die buitemuurse program begin op Woensdag 7 Oktober, en u sal die nuwe sportskedule eersdaags op d6 vind.

SKOOLDRAG

Let daarop dat alle leerders verplig word om hul **someruniform** vanaf die begin van Kwartaal 4 te dra.

Ons herinner u ook graag aan die **nuwe skoolsweetpak** wat vanaf 2027 geleidelik ingefaseer sal word. Volgende jaar se nuwe Gr 1-leerders sal die voortou neem. Meer besonderhede volg binnekort.



EISTEDDFOD-SUKSES

Ons leerders styg jaar ná jaar uit by die Tygerberg Eisteddfod, maar vanjaar het hulle werklik uitmuntend presteer. Laerskool Gene Louw het nie minder nie as **36 kategoriewennertrofeë** opgelewer. Hierdie uitslae is veral merkwaardig wanneer dit vergelyk word met dié van talle ander deelnemende skole.

Welgedaan aan elke leerder wat die skool met trots verteenwoordig het, en baie dankie aan die betrokke personeel en ouers wat hierdie ervaring moontlik gemaak het. Sulke harde werk en toewyding verdien besondere erkenning.



Uit die personeelkamer

Vandeeweesweek groet ons vir **mev. Christelle de Klerk** (Gr 3A1), wat by haar man in Koeweit aansluit, en **mej. Melissa Franken** (Gr 4E3), wat na die Overberg verhuis. Ons bedank hulle vir hul diens en wens hulle alles van die beste toe!



GISTER, VANDAG EN MÔRE

Verlede week het honderde oupas en oumas die kans gehad om hul kleinkinders by die skool te kom besoek. Dié spesiale dag herinner ons aan die belangrike rol wat die ouer generasies speel in die **oordra van geskiedenis, waardes en lewenservaring**.

Hou daarby in gedagte dat ons daagliks besig is om geskiedenis te maak – elke leerder se verhaal word gevorm deur die geleenthede, uitdagings en hoogtepunte wat hy/sy beleef. By Gene Louw is ons trots daarop om daardie stories te help skryf.

Akademiese uitslae: Kwartaal 3

Akademiese uitnemendheid bly een van die hoekstene van ons skool.

Die afgelope kwartaal is daar doelgerig aan verskeie uitdagings gewerk, en die verbetering wat reeds in sekere vakke sigbaar is, is bemoedigend. Hierdie tendens bevestig dat ons intervensieprogramme 'n verskil maak.

Graad	Slaagsyfer %	Gemiddeld %
1	98,2	83,7
2	97,9	84,1
3	95,4	81,4
4	96,8	77,2
5	95,3	76,1
6	95,2	78,9
7	99,2	76,9

Ons is dankbaar teenoor die personeel wat ekstra ure en moeite insit om die nodige ondersteuning te bied. ■